

28/02/1997

Menteri nasihat rakyat Indonesia

SEREMBAN, Khamis - Kerajaan Indonesia meminta rakyatnya yang bekerja di negara ini supaya jangan menimbulkan masalah kepada majikan masing-masing bagi menjamin hubungan baik antara kedua-dua negara sentiasa mesra.

Menteri Urusan Peranan Wanita Indonesia, Mien Sugandhi, berkata mereka hendaklah mematuhi peraturan, di samping meningkatkan prestasi kerja sama ada di kilang atau di mana saja.

Dalam pertemuannya dengan pekerja negara itu yang bekerja di Kompleks Bersepadu Samsung Elektronik, Senawang, dekat sini hari ini, beliau berkata kerajaan Indonesia sentiasa mengikuti perkembangan warganya yang bekerja di Malaysia.

"Setakat ini, pemerintah mahukan mereka yang bekerja di negara asing meningkatkan prestasi, kemahiran dan pengetahuan supaya boleh mencapai tahap kejayaan lebih baik.

"Mereka wajar bersyukur kerana dapat bekerja di negara ini, berbanding nasib 2.5 juta wanita di negara kita yang menganggur dan sentiasa mencari peluang untuk mendapatkan pekerjaan," katanya.

Mien berkata, ramai rakyat Indonesia berpeluang bekerja di negara ini kerana keakraban hubungan antara Malaysia dan Indonesia.

Katanya, Perdana Menteri Malaysia, Datuk Seri Dr Mahathir Mohamad dan Presiden Suharto sentiasa menekankan hubungan erat antara rakyat kedua-dua negara.

(END)